



KEMENTERIAN PERDAGANGAN DALAM NEGERI
DAN HAL EHWAL PENGGUNA

TEKS UCAPAN

**YB DATO' ROSOL BIN WAHID
TIMBALAN MENTERI
PERDAGANGAN DALAM NEGERI DAN HAL EHWAL
PENGGUNA**

**MAJLIS PELANCARAN
PROGRAM FOOD BANK SISWA
UNIVERSITI ISLAM ANTARABANGSA MALAYSIA
CAWANGAN PAGO, JOHOR**

**6 OKTOBER 2022 (KHAMIS)
2.30 PETANG**

**MAHALLAH ZAID HARITHAH
UNIVERSITI ISLAM ANTARABANGSA MALAYSIA
CAWANGAN PAGO, JOHOR**

Terima kasih saudara Pengacara Majlis

Assalamualaikum WBTH, Salam Sejahtera dan Salam Keluarga
Malaysia.

SALUTASI

- 1. YANG BERUSAHA PROFESOR MADYA DR AZRUL AZLEN
BIN ABD HAMID,
DEKAN KULLIYAH BAHASA & PENGURUSAN
UNIVERSITI ISLAM ANTARABANGSA MALAYSIA (UIAM)
CAWANGAN PAGOH**

- 2. YANG BERUSAHA TUAN HAIRUL ANUAR BIN BOHRO,
PENGARAH KEMENTERIAN PERDAGANGAN DALAM NEGERI
DAN HAL EHWAL PENGGUNA (KPDNHEP) NEGERI JOHOR**

- 3. YANG BERUSAHA TUAN MUHAMAD HANIF BIN ASA'ARI,
PENGARAH SEKRETARIAT PERDAGANGAN PENGEDARAN &
INDUSTRI PERKHIDMATAN KPDNHEP**

- 4. TIMBALAN-TIMBALAN DEKAN
UIAM CAWANGAN PAGOH**

- 5. PARA PENYUMBANG, RAKAN-RAKAN MEDIA, WAKIL-WAKIL
PELAJAR DAN HADIRIN HADIRAT YANG SAYA HORMATI
SEKALIAN.**

KATA ALUAN

1. Pertama sekali, marilah kita bersama-sama memanjatkan kesyukuran ke hadrat Ilahi kerana dengan izin dan limpah kurnia-Nya dapat kita bertemu dan berhimpun dalam acara penuh bermakna ini iaitu **Majlis Pelancaran Program Food Bank Siswa di Universiti Islam Antabangsa Malaysia (UIAM) Cawangan Pagoh, Johor.**
2. Sebelum meneruskan ucapan ini, saya ingin mengucapkan Selamat Datang dan tahniah kepada anak-anak mahasiswa yang baru mendaftar di UIAM ini dan Selamat Kembali ke Kampus buat anak-anak mahasiswa *senior* di universiti ini.
3. Ingin saya kongsi di sini, Program Food Bank Malaysia (PFBM) adalah salah satu inisiatif peduli rakyat yang dilaksanakan Kementerian Perdagangan Dalam Negeri dan Hal Ehwal Pengguna (KPDNHEP) bertujuan membantu meringankan kos sara hidup rakyat khususnya

golongan kurang berkemampuan dan menyalurkan bantuan makanan untuk mangsa bencana, di samping mengurangkan pembaziran makanan khususnya di peringkat industri peruncitan, perhotelan dan katering.

4. Program Food Bank Malaysia ini telah dilancarkan di Peringkat Kebangsaan pada **22 Disember 2018** di Kompleks Penyayang, Pulau Pinang. Sejak pelaksanaannya bermula **Ogos 2018** sehingga **Ogos 2022**, seramai **684,056 ahli isi rumah** telah berjaya mendapat manfaat daripada Program Food Bank ini.
5. Secara tidak langsung, PFBM ini yang dijalankan secara berterusan juga telah berjaya mengurangkan pembaziran dan menyelamatkan sebanyak **2,872 metrik tan lebihan makanan**.
6. Susulan Mesyuarat Majlis Tindakan Kos Sara Hidup Negara (NACCOL) pada 15 Februari tahun 2019, Kerajaan telah memutuskan untuk memperluaskan

pelaksanaan Program Food Bank Malaysia yang dikendalikan oleh Kementerian ini ke seluruh Institusi Pengajian Tinggi dan lahirah Program Food Bank Siswa.

7. Program Food Bank Siswa ini juga merupakan inisiatif kolaborasi antara **KPDNHEP, Sekretariat Food Bank Malaysia (SFBM), Rakan Strategik, Institut Pengajian Tinggi (IPT), pihak penyumbang dan penggerak sukarelawan pelajar** bagi memastikan pelaksanaan program berjalan dengan lancar dan lebih sistematik.
8. Objektif Program Food Bank Siswa adalah untuk membantu menangani bebanan para mahasiswa khususnya dari kalangan kurang berkemampuan dalam menampung kos sara hidup yang kian meningkat, sekaligus mengurangkan bebanan pelajar supaya mereka dapat lebih fokus pada akademik.

9. Alhamdulillah, Program Food Bank Siswa ini telah membuka lembaran baharu apabila bantuan makanan kepada anak-anak siswa kini diperluaskan bukan sahaja ke Institusi Pengajian Tinggi Awam (IPTA), malahan juga Institusi Pengajian Tinggi Swasta (IPTS), Institut Pendidikan Guru (IPG) dan rangkaian Politeknik seluruh negara.

Para hadirin yang saya kasihi sekalian,

10. Pelaksanaan Program Food Bank Malaysia ini mempunyai **3 rukun utama** iaitu;
- i. **Pertama: Penyumbang** yang mana peranannya akan dimainkan oleh pihak pasar raya dan industri melalui sumbangan lebihan makanan yang dihasilkan oleh operasi atau perniagaan mereka.
 - ii. **Kedua: Penggerak** yang diterajui oleh pihak NGO dan berperanan untuk mengumpul, mengasingkan dan menyalurkan sumbangan

lebih makanan tersebut kepada golongan sasaran.

iii. **Ketiga: Penerima** yang terdiri daripada mereka yang berpendapatan rendah.

11. Inisiatif Food Bank Siswa ini berkonsepkan “**Daripada Mahasiswa kepada Mahasiswa**” di mana Kementerian mengalu-alukan pelajar yang ingin terlibat dalam menjayakan Food Bank Siswa ini terutamanya dari **Persatuan-Persatuan Pelajar untuk sama-sama membantu golongan pelajar yang memerlukan.**

12. Bagi melancarkan lagi pelaksanaannya, Kementerian telah memperkenalkan Food Bank Siswa melalui **dua konsep** iaitu:

- **Food Pantry:** Penyimpanan barang makanan kering di satu bilik yang sesuai dan diuruskan oleh Persatuan Pelajar yang ditugaskan. Pelajar yang layak menerima bantuan **FOOD BANK**

SISWA ini boleh mengambil makanan mengikut jadual yang ditetapkan.

- **Central Kitchen:** Sumbangan makanan yang boleh dimasak seperti sayur-sayuran dan buah-buahan akan dimasak dan diberikan kepada pelajar yang layak menerima bantuan ini. Central Kitchen akan ditetapkan oleh pihak Universiti dengan melihat kepada kesesuaian premis untuk menyediakan makanan bermasakan.

13. Suka untuk saya kongsi di sini, sejak pelancaran pada Februari 2019 hingga September tahun 2022, seramai **20,951 mahasiswa** telah menerima manfaat dan program ini telah dilancarkan di **27 buah IPT** dengan UIAM Cawangan Pagoh adalah IPT ke 28 yang telah dilaksanakan pelancarannya. Alhamdulillah.

14. Alhamdulillah, sebagai permulaan pelaksanaan Food Bank Siswa di UIAM Pagoh ini, saya dimaklumkan terdapat **500 pelajar** yang layak

menerima bantuan dan akan mendapat manfaat daripada program ini. Program berkonsepkan **Food Pantry** ini akan digerakkan oleh Bahagian Hal Ehwal Pelajar IPT dan dibantu oleh **Majlis Perwakilan Pelajar**.

Hadirin yang saya kasihi sekalian,

15. Kementerian juga amat berbesar hati dengan kerjasama dan kesudian pihak yang terlibat sebagai penyumbang bagi program ini dan tanpa mereka Program Food Bank Siswa ini tidak mungkin dapat dilaksanakan dengan jayanya.
16. Oleh itu, saya ingin mengambil kesempatan di sini untuk merakamkan jutaan terima kasih kepada:
 - i. **Mondelez Malaysia Sales Sdn Bhd**
 - ii. **Mamee Double-Decker (M) Sdn Bhd**
 - iii. **Today Bakeries Products (Klang) Sdn Bhd**
 - iv. **Nestle (Malaysia) Berhad**

- v. Yayasan Al Manjie**
- vi. Le Meridien Putrajaya Hotel**
- vii. Al Huda Enterprise Sdn Bhd**

17. Ingin saya kongsi di sini, Kementerian juga telah melaksanakan Inisiatif Teknologi Pembungkusan Makanan secara *Retort* yang dapat menyelamatkan dan meningkatkan jangka hayat lebih makanan yang masih baik dan belum disentuh daripada industri perhotelan, katering dan pembuat makanan berasaskan pertanian daripada terus dibazirkan.
18. Sehingga kini, Kementerian telah berjaya menempatkan dua belas (12) mesin retort di sepuluh (10) lokasi terpilih seluruh negara termasuk lapan (8) buah hotel yang telah berjaya menghasilkan sebanyak 3,000 pek makanan sejak Mei 2021. Makanan yang telah berjaya diselamatkan ini diagihkan kepada golongan yang telah dikenalpasti termasuk mangsa yang terjejas dengan banjir.

19. Inisiatif ini juga diperluaskan kepada Program Food Bank Siswa di mana para pelajar yang memerlukan akan mendapat manfaat memandangkan makanan *retort* adalah bersifat *ready to eat* dan sangat sesuai untuk pelajar yang berada di kolej kediaman.
20. Pihak Kementerian juga berpandangan program Food Bank Malaysia ini boleh dijadikan sebagai platform bagi membentuk semangat dan budaya sukarelawan di kalangan mahasiswa.
21. Justeru Kementerian amat mengalu-alukan penglibatan daripada semua pihak termasuk dari kalangan cendekia pengajian tinggi untuk bersama-sama Kementerian dalam menggalakkan penglibatan para sukarelawan di dalam program Food Bank Siswa ini.

Hadirin yang saya hormati sekalian,

22. Mungkin ada di kalangan kita yang masih ragu-ragu untuk menyumbang, bimbang sekiranya berlaku

sebarang perkara tidak diingini dalam pemberian sumbangan bekalan makanan untuk program Food Bank ini. Untuk itu ingin saya tegaskan di sini bahawa dalam usaha menggalakkan penglibatan lebih ramai penyumbang dalam program ini, Kementerian telahewartakan Akta Perlindungan Penderma Makanan 2020 (AKPM2020). Ia bertujuan melindungi serta meredakan kebimbangan penderma, terutama pihak industri terhadap risiko tindakan undang-undang sekiranya berlaku perkara tidak diingini, sekaligus menggalakkan sumbangan makanan secara sukarela untuk diagihkan kepada golongan yang memerlukan.

23. Oleh itu saya berharap semoga semua inisiatif yang dirangka akan berjalan lancar dan Akta Perlindungan Penderma Makanan 2020 akan menjadi tunjung menyokong usaha-usaha kementerian ke arah sifar pembaziran makanan dan menangani kekurangan sumber makanan bagi golongan yang memerlukan di negara ini.

24. Dalam kita mula menghadapi peralihan kepada musim tengkujuh yang dijangka bulan depan, saya ingin mengambil kesempatan ini untuk menyeru sektor industri makanan, peruncitan dan pertanian untuk bersama-sama menyumbang kepada Food Bank Malaysia yang boleh disalurkan kepada mangsa-mangsa banjir nanti.
25. Besar juga harapan saya semoga dengan wujudnya Food Bank Siswa di kampus ini, ia sedikit sebanyak dapat **membantu** anak-anak **siswa kurang berkemampuan** dan memerlukan untuk **mendapatkan keperluan makanan.**
26. Saya juga berharap agar penggerak mahasiswa yang menyelia Food Bank Siswa sentiasa **proaktif untuk memastikan bekalan sentiasa mencukupi.** Penggerak mahasiswa harus pantas bertindak menghubungi pihak yang dapat membantu menyalurkan bekalan mengikut keperluan mahasiswa di kampus masing-masing bagi mengelakkan terputus bekalan.

PENUTUP

27. Sebelum mengakhiri ucapan ini, saya berharap Program Food Bank Siswa ini **dapat dilaksanakan secara berterusan dan jaringan kerjasama bersama rakan-rakan strategik dapat dipergiatkan lagi**. KPDNHEP dan SFBM bersedia menerima sebarang cadangan dan maklum balas agar program ini dapat dilaksanakan dengan lebih berkesan untuk manfaat semua pihak.
28. Akhir kata, saya merakamkan setinggi-tinggi terima kasih kepada semua pihak yang terlibat dan bekerjasama untuk program ini. Semoga program ini akan dapat dijayakan dengan cemerlang dan berterusan sebagai inisiatif membantu pelajar yang memerlukan.
29. Dengan lafaz yang mulia Bismillahirrahmanirrahim, saya dengan sukacitanya melancarkan **PROGRAM FOOD BANK SISWA DI UNIVERSITI ISLAM**

ANTARABANGSA MALAYSIA (UIAM)
CAWANGAN PAGOH, JOHOR.

Sekian, terima kasih.